

AKASHVANI AIZAWL

REGIONAL NEWS BULLETIN

HEADLINES (MORNING)

- 1. PHE Minister Prof Lalnilawma’n Aizawl khawpui chep tak kara septic tank thli luanrualna tur soak pit hman anih chuan kawng tam takah khawpui hmasawnna a thlen dawn a ti.
- 2. Electoral roll Special Intensive Revision (SIR) kal mekah Mizoramah Polling Station thar 52 siam a ni dawn.
- 3. Kumin chhungin Mamit District Excise & Narcotics Department-te chuan Ruihhlo kaihhnawih thubuai 222 ziaklut tawhin hemi avang hian mi 135 man an ni tawh bawk.
- 4. Prime Minister Narendra Modi chuan vawiin Pathianni chawhma dar 11 hian ‘Mann Ki Baat’ programme-ah ram chhung leh ram pawn mipuite hnenah thu a sawi leh dawn a, Tum 135-na tur a ni ang.



PHE MINISTER

PHE Minister Prof Lalnilawma’n Aizawl khawpui chep tak kara septic tank thli luanrualna tur soak pit hman anih chuan kawng tam takah khawpui hmasawnna a thlen dawn a ti.

Minister chuan Aizawl khawpui chep takah septic tank thli luanralna tur soak pit nei tha lo leh nei mumal lo an tam hle a. Septic tank tui hi a rimchhiat piah lamah natna hrik tam tak pai a nih vangin him taka deh ral a tul thu a sawi.

Pipe phum tur hi 31.41 km a thui a ni a, tun dinhmunah 8.6 km a thui phum tawh a ni a. Pipe phum hna hi Zan dar 9:00 atanga a tuk zing dar 5:00 thleng thawh thin a ni. He project hian Tuikual Lui a thli luang veng hrang hrang 10 atangin a lakhawm dawn a; chung te chu- Chawnpui, Tuikual North, Tuikual South, Dinthar, Dawrpui Vengthar, Vaivakawn bakah Kanan, IKhatla, Dawrpui leh Zarkawt veng hmun thenkhatte an ni.

Heng veng sawm (10)-ah te hian pipe phum tur a ni a. He hna hmang hian ek thli te hi tui dawt hmanga lakhawmin a sawngbawlina hmun tur (Treatment Plant) ah lui kawra paih hmain sawngbawl thianghlim tur a ni a. Ek thli te leia thamral emaw luikawra paih thin te tihbona hmanrua a ni dawn a. Hei hian soak pit mamawhna

tiboin vantlang hriselna atan hmasawnna a talen dawn bakah leimin laka invenna a nih tel beisei a ni. He pipe hman hian septic tank atanga thli lakkhawm hi sorkar ram MINECO ah a tithianghlimna hmun Sewage Treatment Plant (STP) a sawngbawl tur a ni a. Heta thli tihfim tawh hnu hi leiṭha leh thildangah ṭangkai taka hman leh theih tur a ni.

He STP hian nikhatah ek thli 3.5 million litres a tithianghlim thei dawn a. Septic tank khat tawh, ek paihna tur mumal a la awm loh avangin he project hnuaiah vek dian ek paihna tur Faecal Sludge Treatment Plant (FSTP) pawh STP hmunah hian a awm nghal dawn bawk a ni.

<><><>

POLLING STATIONS

Electoral roll Special Intensive Revision (SIR) kal mekah Mizoramah Polling Station thar 52 siam a ni dawn.

Election Commission of India (ECI)-in SIR kalpui dan tur a duan lawk dan chuan May ni 30 leh June ni 28 inkar chhung hian Booth Level Officer (BLO) te'n an bial chhunga in tin tlawhin enumeration form sem leh lakkhawm hna an thawk ang a. June ni 28 hi polling station siamrem ni atana hman turin a ruahman bawk a. Tun dinhmuna hriat theih chinah Polling Station thar 52 siam belh tura ruahman a nih avangin Mizoramah polling station 1,301 awm thin kha polling station 1,353 a awm tawh dawn a. ECI duhdan angin polling station hi vote neite awmna atanga kilometre 2 aia hla ke a kal ngai lo tura dah tur a ni a. Polling station tina vote awm zat hi 1,200 aia tam lo tura ruahman a ni ta bawk.

Tun dinhmunah polling station siam thar turte hi ECI chuan a rawn pawmpui tawh na a, vawiinah hian online a kimchang zawka dah tura duan fel hman tum a nih thu Chief Electoral Officer (CEO) pisa atanga thudawn chuan a sawi a ni.

Puan tawh angin electoral roll Special Intensive Revision (SIR) kal mekah Mizoramah enumeration form digitise hna zawh fel a ni ta a SIR thawh thumna a state zo hmasa ber a ni. Mizoram chhunga Booth Level Officer (BLO) 1,301-te chuan May ni 30 atang khan Special Intensive Revision atana Election Commission of India (ECI) thupek angin vote neite inziahluhna tur lehkha sem chhuah, laklet leh digitise hna hi ngawrh takin an thawk a. June ni 28 a zawhfel tura ECI hun biktuk hma ni 3, Ningani tlai khan digitisation hi zawhfel vek a ni a, SIR thawh thumna kalpuitu state 16 leh UT 3-te zingah Mizoram hian digitisation hi a zo hmasa ber a ni.

He tih lai hian enumeration form sem chhuah tawh lak kir theih loh hi 48,434 a awm a. An zinga mi 21,194 te chu electoral roll a chuang si thi tawhte an ni a. Hmun danga insawn nghet tawh mi 14,179 an awm a. Hmuh zawh loh hi mi 8,571 an awm a, inziaklut tawh sa mi 2,161 an awm bawk. Mi 329 chu sakhaw rinna vanga e. roll-a inziak lut duh lo an awm bawk a ni.

<><><>

DRUGS-RELATED DEATHS

Mizoramah kumin 2026 chhungin ruihhlo vangin mi 26 an thi tawh a, zu kaihhnawih vangin mi 18 an thi tawh bawk.

Excise & Narcotics Department chhinchhiah danin, kumin hian ruihhlo vangin mipa 23 leh hmeichhia 3, an vaiin mi 26 an thi tawh a. Heroin leh damdawi dang tihpawlh hman sual vanga thi te an ni. Excise & Narcotics department-in a chhinchhiah tan kum 1984 atanga tun thla June ni 24 thlengin Mizoramah ruihhlo vangin mi 2,023 an thi tawh a, chu'ng zinga mi 1,776 chu mipa niin hmeichhia 247 an awm bawk.

Hetihual hian kumin chhungin zu kaihhnawih vangin mi 18 an thi tawh a, Champhai District-ah tam berin mi 8, Lunglei leh Kolasib district-ah mi 4 ve ve leh

Khawzawl district ah mi 2 an thi tawh a ni. Excise & Narcotics department chhinchhiah danin, kum 2014 atanga tun thla June ni 12 thleng khan Mizoramah zu kaihhnawih vangin mi 325 an thi tawh a, an zinga mi 279 chu mipa niin, hmeichhia 46 an awm bawk. Nikum, 2025 kha zu kaihhnawih, a bikin zu chhe in avanga thi an tam ber kum a ni a, mipa 81 leh hmeichhia 13, an vaiin mi 94 in zu an thihpui a. Kum 2024 pawh khan mipa 57 leh hmeichhia 9 thi-in zu vanga thi hi mi 66 an awm a ni.

Kumin January atanga June ni 24 inkar chhung khan Excise & Narcotics department hian heroin kg. 15 leh gram 117 an man tawh a. Methamphetamine kg. 62 leh gram 704 bakah crystal meth kg. 9 leh gram 807 an man tawh bawk a. Ganja kg 128 leh gram 544 an man bakah khuh damdawi leh thalaite’n an hman sual chi damdawi tam tham tak an man tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MNF DEMAND

MNF party chuan sorkarin Mizotaxi Apps kaltlanga taxi leh auto rickshaw hmangtute atanga chhiah lak a tum chu sut leh an phut.

Nimin khan thuchhuah siamin MNF party chuan ZPM sorkarin mipuiah chhiah chi hrang hrang a tihsan chhunzawm kal zelah, Taxi leh Auto Rickshaw-te chu Mizotaxi Online Application hman luihtir a tum niin an puh a. Hei hi Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owners Association (ADAROA) te chuan him taw loah ngaiin, driver-te chuan chhiah khawntu (collector) atana hman nih an duh loh thu an sawi niin an tarlang a. Lirthei neitute’n he apps hmang tura inziahluhna atan cheng 500/- an chawi theuh dawn bakah, Taxi/Auto hmangtu (mipui) ten an hman a piangin chhiah za zela 6 atanga za zela 10 zel an chawi a ngai tawh dawn a ni an ti a. Mizotaxi Apps hmanga mipuiah chhiah lak tur hi eng dan hmanga lak nge tih pawh hriat a ni lo a, chuvangin sorkar hian a thil tih tum hi sut leh ngei turin MNF chuan a ngen tih an tarlang a ni.

Hei hian ZPM sorkar mumal lohzia te, central BJP sorkar tlawn reng chung a sum an sawi chhuah theih ve loh avanga mipui tawrhtirnaah MNF chuan a ngai niin an sawi a. Sawrfu leh tur awm tawh chuanglo chhungkaw engemaw zatin eizawwna turin Taxi/Auto Rickshaw loan hmangin an la a, ei zawn na’n an hmang ni a sawiin mirethei zawkte chungah heti taka ZPM sorkarin chhiah khawn belh a tum mek te, a inlulinna leh hleilenna hi MNF chuan tha a ti lo hle a ni, tiin an thuchhuah chuan a sawi bawk a.

Mizotaxi Apps hi lirthei nei ve lo, a hmangtu mipuiten an hman a pianga sorkara chhiah an pekna tura ruahmanna anih avangin, sorkar hian Mizotaxi Online Application hi sut leh ngei turin MNF chuan a ngen nawn leh tih an tarlang a ni.

<><><>

HEALTH MINISTER

Health Minister Pi Lalrinpuii chuan nimin khan Kolkata a Mizoram Universal Health Care Scheme (MUHCS) Empanelled Hospital, Mizo damlo refer tamna - Natralaya RN Tagore Hospital leh Manipal Hospital, EM bypass Road ami te chu a tlawh.

RN Tagore Hospital hi lung lam leh kal thlakna lama damdawiin tawnhriat nei tha tak an niin, Civil Hospital, Aizawl a kal thlakna kalpuina tura rawn puitu damdawi-in an ni a. Tunah hian Civil Hospital Doctor leh thawktu dangte’n training thawhkhatna an zo tawh a, training thawhnhnihna tan leh tum mek a ni a. Health Minister chuan damlo refer te lo enkawl mai bakah Tagore Hospital leh Mizoram damdawiin te chuan Mizoram Sawrkar damdawiin tihchangtlunna tura hmachhawp hrang hrangah thawhhona tam zawk neih a duh thu a sawi a. Damdawi-in a awm mek Mizo damlote pawh harsatna an neih leh neih loh zawtin, a kan nghal bawk a ni. Damlo boral palh an awm a, Death Certificate pek chhuah muang deuh hlek thin pawh a rang thei anga pe chhuak turin Tagore damdawi-in thuneitute chu a ngen nghal a ni.

Hemi hnu hian Health Minister hian Manipal Hospital, EM Bypass Road, Kolkata a tlawh leh a. He damdawi-in hi cancer lamah super speciality hospital niin, khawl thar tha ber ber te nena thuam an nih avangin Cancer enkawlna kawngah chuan an rintlak thu an lo hrih a. ICU leh Radiation wing te a tlawh nghal bakah damlo inenkawl mekte pawh kan nghalin, harsatna an neih leh neih loh te a zawt nghal bawk.

<><><>

MAMIT END ACTIVITIES

Kumin chhungin Mamit district Excise & Narcotics Department-te chuan Ruihhlo kaihhnawih thubuai 222 ziaklut tawhin hemi avang hian mi 135 man an ni tawh bawk.

Mamit district Excise & Narcotics te chuan kumin kumtir atanga tunkar tir thleng khan ruihhlo kaihhnawih thubuai 222 ziaklut tawhin heng zinga thubuai 208 te chu zu kaihhnawih MLP, 2019 thubuai niin mi 125 man an ni tawh a. Thubuai ziahluh dang 14 te chu ND&PS Act, 1985 thubuai te niin mi 10 man an ni tawh bakah ruihhlo phurna lirthei 11 an man tawh bawk. Mamit END te hian Rakzu litres 1,426, zu bilh lai Tin 2,243, Sap zu um 68, zu siamna bel 42, Heroin gram 73, Alprazolam mum 6,000 te bakah ganja, codeine, nitrezepam, wine leh beer te an man tawh a ni.

Mamit district Excise & Narcotics te hian Mamit district ah Ruihhlo a hluar loh na'n theih tawp an chhuah a, kawngpui dungah surprise checking te neiin khaw hrang hrang an fan kual bakah zu siamna awmna te pawh an zawngin an ti chhe thin a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 135-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

